

# Egitarau zabala begibistan, Sagardo Egunaren bueltan



Maiatzaren 19an izango da Sagardo Eguna. Aurretik izango dira hainbat ekitaldi.

**E**z ahaztu honako data hau; maiatzaren 19a. Egun horretan ospatuko da XXXII. Sagardo Eguna. Sagardo Egunaren Lagunak taldeko kideak antolakuntza lanetan murgilduak daude jada. Baina ez eurak bakarrik, baita beste zenbait eragile ere. 2013ko edizio honen bueltan sagardogintzari loturiko beste hainbat ekitaldi ere antolatu baitira, hila-bete honen amaieran hasi eta ekaina heldu artean. Deialdi guztiok, "1. Sagastia Loretan" izeneko egitarauan bildu dituzte.

Datorren astekarian zehaztasun gehiagoren berri emango dizuegun arren, aurreratu dezakegu jada, egitarau zabal honi hasiera emango dion lehen hitzordua, apirilaren 27an burutuko dela. Sagasti loretueta barrena ibilaldia antolatu dute, Jakoba Errekondo paisajistarekin. Txangoa, goizeko 9:30ean abiatuko da, Alkartasuna Kooperatibatik.

Maiatzerako, Sagardo Egunarekin batera, beste bisita gidatu bat ere iragarria dago, kasu honetan, Aginagako Sari baserrira. Hilabete berean, egina dagoen "Usurbilgo sagastien inventarioa eta sagar ekoizpena" izeneko iker-

keta aurkeztuko da. Udalerrri honetako sagarkien dastaketa ikastaroa ere burutzekoa da. Sagastien udako inausketa ikastaroa programatu dute baita, ekitaldi guztiok antolatzen dabiltzan eragileok: Usurbilgo Sagardo Egunaren lagunak elkarteak; Alkartasuna; NOAUA! Kultur Elkarteak; Usurbilgo Sagastia E.M.; Itaya Gazte Asanblada; Aitzaga Elkarteak; Sagardoa eta Sagarra Unibertsitatea; eta Gipuzkoako Sagardogileen Elkarteak.

## Sagardo dastatze gidatua, larunbat honetan Saizarren

Sagardoaren Lurraldeak deituta, larunbat honetan 11:00etan Saizar Sagardotegian. Bertaratu asmo duenak, aldeztu aurretik izena eman behar du, 943 550 575 telefono zenbakira deituta edo [info@sagardoarenlurraldea.com](mailto:info@sagardoarenlurraldea.com) helbidera email bat idatzita. 10 euroren truke, kata gidatua parte hartu eta pintxoak dastatu ahal izango dira. Fernando Vadillo enologoak zuzenduko du eta ekitaldia. "Proposamena sagardo bakoitzaren berezitasunak bereizten ikasi nahi dituen sagardozaletzi zuzendua dago", berri eman dute antolatzaileek.

## Krisiaren inguruko mozioa erregistratu du Auzolan Elkarteak

"Krisiaren aurrean zer egin?" izeneko jardunaldiak antolatu zituen Auzolan Elkarteak, joan den urtarrilaren 17 eta 18an. Hitzorduen baitan, herritar eta eragileen artean, krisi egoera honi aurre egiteko proposamena aurkeztu zen. Proposamen hau orain, mozio moduan Usurbilgo Udalean erregistratu du Auzolan Elkarteak, datorren osoko bilkuran eztabaidatua eta bozkatua izan dadin. Aurretik ezohiko deialdirik ez bada, hurrengo osoko ohiko bilkura apirilaren 30ean burutuko da, 18:00etatik aurrera Usurbilgo Udaleko udalbatza aretoan.

## Ikuspegi estrategiko bateratua

Auzolan Elkartetik egin duten planteamenduaren jatorrian, honako hipotesi edo kezka planteatzen dute: "ekonomiaren kolapso batera iristeko arriskua ikusten dugu, hipotesi gisa. Horrek, Usurbilen bizigaren pertsona guztiongan ondorioak izango lituzke". Egoera honen aurrean, "gerta litekeen hipotesi horri kolektiboki aurre egiteko prozesu bat irekitzea" eskatzen dute. "Egungo Krisi Orokorren baitan, Usurbilgo herriarentzat Ikuspegi Estrategiko Bateratu bat eratzeke gogoeta kolektiboaren prozesua garatzea", Auzolan Elkartekoen txostenak jasotzen duenez.

## Nola aurre egin?

Euren proposamena, zirriborroa dela ohartarazten dute, "Udalaren eta herriko talde-eragileen arteko eztabaidari bide eman nahi diona". Ildo horretatik, aipatu testuak zergatik eta zertarako galderei erantzuten diela berri ematen du Auzolan Elkarteak, "eta zer garatu daitekeen aurreikusten du". Aldiz, nola egin behar den, "hori eztabaidaren emaitza" izatea nahi dute.

**Okindegia-Gozotegia**  
**LABE-GOXO**

**ANTXETA**  
taberna-jatetxea  
eguneko menuak  
ogitartekoak  
plater konbinatuak  
Eguzkitza, 4 • tel: 943 37 03 44

**TAXI**  
607 92 87 70  
943 00 44 83  
Angel (24h) USURBIL

Andoni Errazkin  
**Xukin**  
igeltseritza orokorra  
Barne eta kanpoko lanak  
**USURBIL**  
663 08 76 71 • 943 24 34 65